



Godina XX - Broj 10

ZENICA, četvrtak, 10.12.2015.god.

## SKUPŠTINA

361.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona, na 20. sjednici, održanoj dana 09.12.2015. godine, donosi:

### ZAKON O KANTONALNIM MINISTARSTVIMA I DRUGIM TIJELIMA KANTONALNE UPRAVE

#### DIO PRVI - OPĆE ODREDBE

##### Član 1.

##### (Osnivanje kantonalnih organa uprave i upravnih organizacija)

Ovim se Zakonom osnivaju ministarstva, uprave i upravne organizacije Zeničko-dobojskog kantona, (u daljem tekstu: Kanton), te se određuje njihov djelokrug i uređuju druga pitanja od značaja za njihovo organiziranje i funkcionisanje.

##### Član 2.

##### (Organi koji vrše poslove uprave)

- (1) Poslove uprave, stručne i s njima povezane upravne poslove iz okvira nadležnosti Kantona vrše kantonalna ministarstva, kantonalne uprave i kantonalne upravne organizacije, (u daljem tekstu: tijela uprave), utvrđene ovim zakonom.
- (2) Tijela iz stava (1) ovog člana, pored poslova iz djelokruga utvrđenog ovim zakonom, obavljaju i druge poslove utvrđene zakonima, u skladu sa Ustavom Federacije Bosne i Hercegovine i Ustavom Zeničko-dobojskog kantona.

##### Član 3.

##### (Ministarstvo)

- (1) Ministarstvo je organ uprave koji obavlja upravne i stručne poslove iz nadležnosti Zeničko-dobojskog

kantona u jednom ili više srodnih područja u kojima kantonalni organ uprave, u cjelini ili djelomično, zakonom odnosno drugim propisom određenom obimu, izravno izvršava ili osigurava primjenu zakona i drugih propisa i odgovara za njihovo izvršavanje.

- (2) Ministarstvo priprema zakone i druge propise i opće akte iz svog djelokruga, te obavlja i druge poslove određene posebnim zakonima i drugim propisima.

##### Član 4.

##### (Kantonalna uprava i Kantonalna upravna organizacija)

- (1) Kantonalna uprava i kantonalna upravna organizacija osniva se za obavljanje upravnih i stručnih poslova čija priroda i način izvršavanja zahtijevaju posebnu organiziranost i samostalnost u radu.
- (2) Kantonalna uprava i kantonalna upravna organizacija može se osnovati kao samostalna kantonalna uprava i samostalna kantonalna upravna organizacija i mogu imati svojstvo pravnog lica.
- (3) Kantonalna uprava i kantonalna upravna organizacija može se osnovati u sastavu ministarstva ako je potrebno zbog međusobne povezanosti poslova iz nadležnosti ministarstva i kantonalne uprave, kantonalne upravne organizacije i kada je, pored određenog stepena samostalnosti u vršenju poslova iz nadležnosti kantonalne uprave i kantonalne upravne organizacije, potrebno osigurati usmjeravanje i nadzor u obavljanju poslova iz nadležnosti tih kantonalnih uprava i kantonalnih upravnih organizacija od strane ministarstva.

##### Član 5.

##### (Odnos ministarstva prema upravi, odnosno upravnoj organizaciji u sastavu ministarstva)

U okviru poslova iz nadležnosti kantonalne uprave, odnosno kantonalne upravne organizacije koja se nalazi u sastavu kantonalnog ministarstva, ministar donosi podza-

konske propise i opće akte za izvršavanje kantonalnih zakona iz tih oblasti i vrši upravni nadzor nad radom te uprave, odnosno upravne organizacije u skladu sa zakonom.

### **Član 6.**

#### **(Stručne službe)**

- (1) Za obavljanje stručnih, tehničkih i drugih poslova za potrebe Kantona i tijela uprave mogu se osnovati određene stručne, tehničke i druge službe, kao zajedničke ili samostalne službe koje mogu imati svojstvo pravnog lica.
- (2) O osnivanju službe iz stava (1). ovog člana za potrebe tijela uprave odlučuje Vlada Kantona.

### **Član 7.**

#### **(Sjedište tijela uprave)**

- (1) Sjedište tijela uprave je u Zenici.
- (2) Vlada Kantona može odrediti da neka tijela uprave mogu imati sjedište van Zenice.

### **Član 8.**

#### **(Zastupljenost)**

- (1) U tijelima uprave osigurava se proporcionalna zastupljenost konstitutivnih naroda i grupe Ostalih, u skladu sa Amandmanom IX Ustava Zeničko-dobojskog kantona, kao i ravnopravna zastupljenost oba spola.
- (2) Gramatička terminologija korištenja muškog roda u ovom zakonu podrazumijeva uključivanje oba spola.

## **DRUGI DIO – KANTONALNI ORGANI UPRAVE**

### **POGLAVLJE I. KANTONALNA MINISTARSTVA**

#### **Član 9.**

##### **(Kantonalna ministarstva)**

Kantonalna ministarstva su:

- a) Ministarstvo unutrašnjih poslova – Ministarstvo unutarnjih poslova,
- b) Ministarstvo za pravosuđe i upravu,
- c) Ministarstvo finansija – Ministarstvo financija,
- d) Ministarstvo za privredu – Ministarstvo za gospodarstvo,
- e) Ministarstvo za prostorno uređenje, saobraćaj i komunikacije i zaštitu okoliša,
- f) Ministarstvo za rad, socijalnu politiku i izbjeglice,
- g) Ministarstvo za boračka pitanja – Ministarstvo za braniteljska pitanja,

h) Ministarstvo zdravstva,

i) Ministarstvo za obrazovanje, nauku, kulturu i sport – Ministarstvo za obrazovanje, znanost, kulturu i sport

j) Ministarstvo za poljoprivredu, šumarstvo i vodoprivredu.

### **Član 10.**

#### **(Ministarstvo unutrašnjih poslova)**

(1) Ministarstvo unutrašnjih poslova vrši upravne i stručne poslove utvrđene Ustavom, zakonom i drugim propisima, koji se odnose na ostvarivanje nadležnosti Kantona u oblasti unutrašnjih poslova i poslova inspekcijiskog nadzora nad radom agencija i unutrašnjih službi za zaštitu ljudi i imovine, poslove inspekcijiskog nadzora nad provođenjem mjera zaštite od požara i nad provođenjem propisa iz oblasti matičnih knjiga, u skladu sa zakonom.

(2) Ministarstvo vrši upravne i druge stručne poslove koji se odnose na prvostepeni i drugostepeni upravni postupak po zakonima i aktima o provođenju tih zakona iz nadležnosti Ministarstva, priprema zakone i druge propise iz nadležnosti Ministarstva.

(3) Ministarstvo obavlja i druge poslove koji su mu stavljani u nadležnost posebnim zakonom.

### **Član 11.**

#### **(Ministarstvo za pravosuđe i upravu)**

(1) Ministarstvo za pravosuđe i upravu vrši upravne, stručne i druge poslove utvrđene ustavom, zakonom, i drugim propisom koji se odnose na ostvarivanje nadležnosti Kantona, u oblasti pravosuđa, pravobranilaštva, uprave i lokalne samouprave, poslove upravne inspekcije, nadzor rada notara, kao i druge upravne poslove koji ne spadaju u djelokrug drugog tijela uprave Kantona.

(2) Ministarstvo obavlja poslove davanja mišljenja o usklađenosti zakona i drugih propisa koje donosi Skupština Kantona, Vlada Kantona sa propisima o organizaciji organa uprave, propisima iz oblasti prekršaja, sa Europskom konvencijom o zaštiti ljudskih prava i osnovnih sloboda i drugim instrumentima zaštite ljudskih prava, koji imaju pravnu snagu ustavnih odredaba.

(3) Ministarstvo obavlja i poslove koji se odnose na registraciju udruženja, zaklada, fondacija i drugih evidencija utvrđenih posebnim zakonima za područje Zeničko-dobojskog kantona.

- (4) Ministarstvo za pravosuđe i upravu vrši upravne i druge stručne poslove koji se odnose na prvostepeni i drugostepeni upravni postupak po zakonima i aktima o provođenju tih zakona iz nadležnosti Ministarstva, priprema zakone i druge propise iz nadležnosti Ministarstva.
- (5) Ministarstvo obavlja i druge poslove koji su mu stavljeni u nadležnost posebnim zakonom.

### Član 12.

#### (Ministarstvo finansija)

- (1) Ministarstvo finansija vrši upravne, stručne i druge poslove utvrđene zakonom i drugim propisima koji se odnose na ostvarivanje nadležnosti Kantona u oblasti finansija i to: sistem poreza, taksi i drugih javnih prihoda, predlaganje mjera za unapređenje poreskog sistema, sistem raspodjele javnih prihoda, sistem finansiranja javne potrošnje, poslovi planiranja i izvršenja Budžeta Kantona, u okviru trezorskog poslovanja vođenje računovodstva i računovodstvenih politika kojim se uređuje planiranje, evidentiranje, analiziranje, nadzor i izvještavanje o poslovnim događajima budžetskih korisnika i izvanbudžetskih fondova, davanje instrukcija budžetskim korisnicima, vođenje jedinstvenog računa trezora, upravljanje novcem, dnevno praćenje novčanih sredstava i utvrđivanje dinamike plaćanja i planiranja nedostajućih sredstava, otplate duga, izdavanje garancija, nova zaduženja, kontrola ostvarivanja Budžeta Kantona, centralizirani obračun i isplata plaća za sve budžetske korisnike, kantonalna budžetska revizija.
- (2) Ministarstvo finansija vrši upravne i druge stručne poslove koji se odnose na prvostepeni i drugostepeni upravni postupak po zakonima i aktima o provođenju tih zakona iz nadležnosti Ministarstva, priprema zakone i druge propise iz nadležnosti Ministarstva.
- (3) Ministarstvo obavlja i druge poslove koji su mu stavljeni u nadležnost posebnim zakonom.

### Član 13.

#### (Ministarstvo za privredu)

- (1) Ministarstvo za privredu vrši upravne, stručne i druge poslove utvrđene Ustavom, zakonom i drugim propisima, koji se odnose na ostvarivanje nadležnosti Kantona u oblasti privrede i to: prerađivačke industrije, energetike, rudarstva, geološka istraživanja, koncesije, javno-privatno partnerstvo, trgovine, ugostiteljstva, turizma, razvoja preduzetništva i obrta, osim proizvodnje hrane, pića, prerade duhana i duhanskih

proizvoda, oblasti građevinarstva, bankarstva, saobraćaja i komunalnih djelatnosti.

- (2) Ministarstvo za privredu vrši upravne i druge stručne poslove koji se odnose na prvostepeni i drugostepeni upravni postupak po zakonima i aktima o provođenju tih zakona iz nadležnosti Ministarstva, priprema zakone i druge propise iz nadležnosti Ministarstva.
- (3) Ministarstvo obavlja i druge poslove koji su mu stavljeni u nadležnost posebnim zakonom.

### Član 14.

#### (Ministarstvo za prostorno uređenje, promet i komunikacije i zaštitu okoliša)

- (1) Ministarstvo za prostorno uređenje, promet i komunikacije i zaštitu okoliša vrši upravne i stručne poslove utvrđene Ustavom, zakonom i drugim propisima, koji se odnose na ostvarivanje nadležnosti Kantona u oblasti prostornog uređenja, građenja, zaštite okoliša, komunalnih djelatnosti, prometa i komunikacija.
- (2) Ministarstvo za prostorno uređenje, promet i komunikacije i zaštitu okoliša vrši upravne i druge stručne poslove koji se odnose na prvostepeni i drugostepeni upravni postupak po zakonima i aktima o provođenju tih zakona iz nadležnosti Ministarstva, priprema zakone i druge propise iz nadležnosti Ministarstva.
- (3) U sastavu Ministarstva za prostorno uređenje, promet i komunikacije i zaštitu okoliša su:
- Kantonalni zavod za urbanizam i prostorno uređenje i**
  - Kantonalna direkcija za ceste.**
- (4) **Kantonalni zavod za urbanizam i prostorno uređenje** vrši upravne i druge stručne poslove utvrđene zakonom i drugim propisima, koji se odnose na ostvarivanje nadležnosti Kantona u oblasti izrade planskih dokumenata za koje su nadležni Kanton i jedinice lokalne samouprave, planiranja prostornog i društveno-ekonomskog razvoja.
- (5) **Kantonalna direkcija za ceste** vrši stručne poslove i sa njima povezane upravne poslove utvrđene zakonom i drugim propisima, koji se odnose na nadležnost Kantona u izgradnji, rekonstrukciji, održavanju, zaštiti i upravljanju regionalnim cestama.
- (6) Ministarstvo obavlja i druge poslove koji su mu stavljeni u nadležnost posebnim zakonom

**Član 15.****(Ministarstvo za rad, socijalnu politiku i izbjeglice)**

- (1) Ministarstvo za rad, socijalnu politiku i izbjeglice vrši upravne i stručne poslove utvrđene zakonom iz nadležnosti Kantona u oblasti socijalne politike, rada, zaštite i povratka raseljenih lica, i to provođenjem:
- politike rada i zapošljavanja, ostvarivanje osnivačkih prava Kantona prema Javnoj ustanovi Služba za zapošljavanje i nadzor nad njenim radom, kreiranje politike od značaja za podsticaj zapošljavanja osoba sa invaliditetom i obavljanje drugih poslova od značaja za oblasti rada i zapošljavanja,
  - socijalne politike kroz socijalnu zaštitu građana u stanju socijalne potrebe i zaštitu porodica sa djecom, te zaštitu civilnih žrtava rata, koordinacija i nadzor nad radom nadležnih općinskih službi i ustanova socijalne zaštite, iniciranje i provođenje mjera od značaja za razvoj socijalnih prava građana i prevenciju u oblastima socijalne i porodične zaštite, istraživanja socijalnih pojava i suzbijanje socijalno-patoloških pojava, ostvarivanje osnovnih prava prema ustanovama iz oblasti socijalne zaštite čiji je osnivač Kanton,
  - politike zaštite i povratka raseljenih osoba i povratnika kroz mjere i aktivnosti obnove i rekonstrukcije stambenih objekata u funkciji povratka, koordinacija u radu sa nevladinim organizacijama, rješavanje statusnih pitanja raseljenih osoba i povratnika u prvostepenom postupku i nadzor nad provođenjem kantonalnog zakona i podzakonskih akata iz ove oblasti,
  - humanitarne djelatnosti kroz izradu projekata i planova od značaja za zapošljavanje i socijalnu sigurnost građana, davanje mišljenja na humanitarne projekte organizacija registrovanih na federalnom nivou koje djeluju na području Kantona, iniciranje projekata humanitarnog karaktera, planiranje osnovnih i drugih potreba stanovništva za humanitarnom pomoći, nabavka i distribuiranje humanitarne pomoći, podsticaj rada nevladinih udruženja i provođenje drugih aktivnosti od značaja za humanitarnu djelatnost.
- (2) Ministarstvo za rad, socijalnu politiku i izbjeglice vrši upravne i druge stručne poslove koji se odnose na prvostepeni i drugostepeni upravni postupak po zakonima i aktima o provođenju tih zakona iz nadležnosti Ministarstva, priprema zakone i druge propise iz nadležnosti Ministarstva.

- (3) Ministarstvo za rad, socijalnu politiku i izbjeglice je nadležno i za druge poslove u skladu sa odredbama posebnih zakona.

**Član 16.****(Ministarstvo za boračka pitanja)**

- (1) Ministarstvo za boračka pitanja vrši upravne i stručne poslove utvrđene Ustavom, zakonom i drugim propisima, koji se odnose na ostvarivanje nadležnosti Kantona u oblasti zaštite branilaca iz domovinskog/obrambeno-oslobodilačkog rata od 18.9.1991. godine do 23.12.1995. godine, pripadnika jedinica Oružanih snaga RBiH i ratnih postrojbi HVO-a i članova njihovih porodica: članova porodica šehida, poginulih, umrlih i nestalih boraca, članova uže porodice poginulih, umrlih ili nestalih dobitnika ratnog priznanja i odličja, dobitnika ratnih priznanja i odličja i članova njihovih porodica, ratnih vojnih invalida i članova njihovih porodica i demobilisanih boraca i članova njihovih porodica, kao i druga pitanja iz oblasti zaštite boraca i članova njihovih porodica, sa posebnim osvrtom na poslove u vezi sa regulisanjem socijalno-statusnih pitanja boraca i članova njihovih porodica: pitanja zdravstvene zaštite, medicinske rehabilitacije, stambenog zbrinjavanja, pomoći u školovanju i zapošljavanju, podizanja nadgrobnih spomenika/nišana i spomen obilježja, novčane pomoći zbog teške ekonomske situacije i drugo.
- (2) Ministarstvo osigurava zaštitu i sudionika narodno-oslobodilačkog rata 1941.-1945.godine i sudionika drugih oslobodilačkih ratova i pokreta, u skladu sa važećim zakonima i drugim propisima.
- (3) Ministarstvo provodi upravne postupke iz svoje nadležnosti, daje mišljenje pri donošenju sistemskih propisa kojim se reguliraju osnovna pitanja boraca i članova njihovih porodica na nivou Federacije BiH, priprema zakone i druge propise kojim se regulišu socijalno-statusna pitanja boraca i članova njihovih porodica na području Kantona, te prati stanje u oblasti boračko-invalidske zaštite.
- (4) Ministarstvo obavlja i druge poslove koji su mu stavljani u nadležnost posebnim zakonom.

**Član 17.****(Ministarstvo zdravstva)**

- (1) Ministarstvo zdravstva vrši upravne i stručne poslove utvrđene Ustavom, zakonom i drugim propisima, koji se odnose na ostvarivanje nadležnosti Kantona u oblasti zdravstva i zdravstvenog osiguranja i to:

**Član 19.****(Ministarstvo za poljoprivredu, šumarstvo i vodoprivredu)**

- a) koordinira i prati funkcionisanje i razvoj sistema zdravstvene zaštite i zdravstvenog osiguranja radi ostvarivanja prava osiguranih lica,
  - b) koordinira i prati stručni rad zdravstvenih ustanova, privatnih praksi i drugih oblika obavljanja zdravstvene djelatnosti u vidu nadzora,
  - c) po potrebi utvrđuje mrežu zdravstvene djelatnosti (primarna, specijalističko-konsultativna zdravstvena zaštita i mreže farmaceutske djelatnosti),
  - d) organizira obavljanje mrtvozorstva na području Kantona.
- (2) Ministarstvo zdravstva vrši upravne i druge stručne poslove koji se odnose na prvostepeni i drugostepeni upravni postupak po zakonima i aktima o provođenju tih zakona iz nadležnosti Ministarstva, priprema zakone i druge propise iz nadležnosti Ministarstva.
- (3) Ministarstvo obavlja i druge poslove koji su mu stavljeni u nadležnost posebnim zakonom.

**Član 18.****(Ministarstvo za obrazovanje, nauku, kulturu i sport)**

- (1) Ministarstvo za obrazovanje, nauku, kulturu i sport vrši upravne i stručne poslove utvrđene Ustavom, zakonom i drugim propisima, koji se odnose na ostvarivanje nadležnosti Kantona u oblasti obrazovanja i nauke, kulture i sporta u skladu sa zakonom.
- (2) U sastavu Ministarstva za obrazovanje, nauku, kulturu i sport je upravna organizacija Pedagoški zavod.
- (3) **Pedagoški zavod** vrši stručne i s njima povezane upravne poslove utvrđene zakonom i drugim propisima, koji se odnose na ostvarivanje nadležnosti Kantona u oblasti predškolskog, osnovnog i srednjeg obrazovanja.
- (4) Ministarstvo za obrazovanje, nauku, kulturu i sport vrši upravne i druge stručne poslove koji se odnose na prvostepeni i drugostepeni upravni postupak po zakonima i aktima o provođenju tih zakona iz nadležnosti Ministarstva, priprema zakone i druge propise iz nadležnosti Ministarstva.
- (5) Ministarstvo obavlja i druge poslove koji su mu stavljeni u nadležnost posebnim zakonom.

- (1) Ministarstvo za poljoprivredu, šumarstvo i vodoprivredu vrši upravne i stručne poslove utvrđene Ustavom, zakonom i drugim propisima, koji se odnose na ostvarivanje nadležnosti Kantona u oblasti poljoprivrede, šumarstva, vodoprivrede, koncesija, veterinarstva, lovstva, javnog-privatnog partnerstva i unapređenja biljne i animalne proizvodnje.

- (2) U sastavu Ministarstva za poljoprivredu, šumarstvo i vodoprivredu je Kantonalna uprava za šumarstvo.

- a) **Kantonalna uprava za šumarstvo** obavlja upravne, stručne i druge poslove utvrđene zakonom i drugim propisima koji se odnose na: osiguranje neposredne zaštite državnih šuma i šumskog zemljišta putem čuvarske službe, vodi bazu podataka o stanju i razvoju svih šuma na području Kantona, zastupa interese vlasnika državnih šuma i šumskog zemljišta u postupcima koji se vode po pitanju prava vlasništva, postupcima uzurpacija, eksproprijacija, arondacija, komasacija i zamjene šume i šumskog zemljišta i ugovorom prenosi navedene poslove korisniku državnih šuma i šumskog zemljišta, vrši nadzor nad prikupljanjem podataka za izradu šumskogospodarskih osnova za državne i privatne šume i realiziranje istih, prati izvršenje svih ugovorenih obaveza koji se odnose na državne šume, realizaciju programa zaštite šuma i druge poslove propisane zakonom.

- (3) U sastavu Ministarstva za poljoprivredu, šumarstvo i vodoprivredu su slijedeće upravne organizacije:

**a) Poljoprivredni zavod****b) Zavod za vode**

- (4) **Poljoprivredni zavod** vrši upravne, stručne i druge poslove koji su zakonom i drugim propisom o poljoprivredi, stavljeni u nadležnost Kantona.

- (5) **Zavod za vode** vrši stručne i druge poslove koji su zakonom i drugim propisom o vodama stavljeni u nadležnost Kantona.

- (6) Ministarstvo za poljoprivredu, šumarstvo i vodoprivredu vrši upravne i druge stručne poslove koji se odnose na prvostepeni i drugostepeni upravni postupak po zakonima i aktima o provođenju tih zakona iz nadležnosti Ministarstva, priprema zakone i druge propise iz nadležnosti Ministarstva.

- (7) Ministarstvo obavlja i druge poslove koji su mu stavljeni u nadležnost posebnim zakonom.

## **POGLAVLJE II. SAMOSTALNE KANTONALNE UPRAVE**

### **Član 20.**

#### **(Samostalne kantonalne uprave)**

- (1) Samostalne kantonalne uprave su:
- a) Kantonalna uprava za inspekcijske poslove,
  - b) Kantonalna uprava civilne zaštite

### **Član 21.**

#### **(Kantonalna uprava za inspekcijske poslove)**

- (1) Kantonalna uprava za inspekcijske poslove vrši inspekcijski nadzor, odnosno upravno-nadzorne stručne i druge poslove iz nadležnosti Kantona koji se odnose na energetiku, rudarstvo, trgovinu, ugostiteljstvo, turizam, poljoprivredu, šumarstvo, vodoprivredu, veterinarstvo, radne odnose, zaštitu na radu, zdravstvo, sanitarni nadzor, farmaceutski nadzor, ceste i cestovni saobraćaj, građenje i zaštitu životnog okoliša, kao i druge poslove utvrđene zakonom.
- (2) Kantonalna uprava obavlja i druge poslove koji su joj stavljeni u nadležnost posebnim zakonom.

### **Član 22.**

#### **(Kantonalna uprava civilne zaštite)**

- (1) Kantonalna uprava civilne zaštite vrši upravne i stručne poslove utvrđene zakonom i drugim propisima, koji se odnose na ostvarivanje nadležnosti Kantona u oblasti zaštite i spašavanja od prirodnih i drugih nesreća, zaštite od požara, vatrogastva i organizira centar civilne zaštite 121.
- (2) Kantonalna uprava civilne zaštite vrši i poslove inspekcije civilne zaštite, inspekcije za zaštitu od požara i inspekcije za vatrogastvo, u skladu sa zakonom.
- (3) Kantonalna uprava civilne zaštite obavlja i druge poslove koji su joj stavljeni u nadležnost posebnim zakonom.

## **POGLAVLJE III. SAMOSTALNE UPRAVNE ORGANIZACIJE**

### **Član 23.**

#### **(Samostalna kantonalna upravna organizacija)**

- (1) Samostalna kantonalna upravna organizacija je:
- a) Kantonalna direkcija robnih rezervi
  - b) Kantonalni zavod za pravnu pomoć
- (2) Posebnim zakonom mogu se osnivati i druge samostalne upravne organizacije iz nadležnosti Kantona.

### **Član 24.**

#### **(Kantonalna direkcija robnih rezervi)**

- (1) Kantonalna direkcija robnih rezervi vrši stručne i druge poslove koji se odnose na nabavku, razmještaj zanaavljanje, čuvanje i korištenje robnih rezervi Kantona, provođenje mjera radi intervencija na tržištu, balansiranje roba za potrebe rezervi Kantona, saradnja sa drugim organima za robne rezerve u općinama i društvima.
- (2) Kantonalna direkcija robnih rezervi obavlja i druge poslove koji su joj stavljeni u nadležnost posebnim zakonom.

### **Član 25.**

#### **(Kantonalni zavod za pravnu pomoć)**

- (1) Kantonalni zavod za pravnu pomoć vrši upravne i stručne poslove koji se odnose na pružanje besplatne pravne pomoći građanima slabog imovnog stanja, na način i pod uvjetom utvrđenim zakonom kojim se regulira pružanje besplatne pravne pomoći.
- (2) Kantonalni zavod za pravnu pomoć obavlja i druge poslove koji su mu stavljeni u nadležnost posebnim zakonom.

## **DIO TREĆI-RUKOVOĐENJE KANTONALNIM MINISTARSTVIMA, KANTONALNIM UPRAVAMA I KANTONALNIM UPRAVNIM ORGANIZACIJAMA I UNUTRAŠNJA ORGANIZACIJA**

### **Član 26.**

#### **(Rukovođenje tijelom uprave)**

Rukovođenje tijelima uprave, prava, obaveze, odgovornost, postavljenje i razrješenje rukovodioca i rukovođećeg državnog službenika vrši se na način predviđen

propisima o Vladi Kantona, propisima o organizaciji organa uprave, propisima o državnoj službi važećim i za Kanton, posebnim zakonima i propisima kojima se osnivaju tijela uprave.

#### **Član 27.**

##### **(Rukovođenje ministarstvom)**

- (1) Ministarstvom rukovodi ministar.
- (2) Ministar je za svoj rad i stanje u područjima koja su u djelokrugu rada ministarstva odgovoran Vladi Kantona.

#### **Član 28.**

##### **(Rukovođenje pojedinim područjem)**

- (1) U rukovođenju pojedinim područjem rada rukovodiocu pomaže rukovodeći državni službenik i to:
  - a) sekretar ministarstva,
  - b) rukovodilac uprave i upravne organizacije koje se nalaze u sastavu ministarstva,
  - c) pomoćnik ministra,
  - d) glavni inspektor.
- (2) U Ministarstvu unutrašnjih poslova Kantona Upravom policije rukovodi policijski komesar kao rukovodni policijski službenik.

#### **Član 29.**

##### **(Zamjena ministra u slučaju spriječenosti obavljanja funkcije)**

U slučaju privremene spriječenosti ministra u obavljanju njegovih ovlaštenja i obaveza, mijenja ga rukovodeći državni službenik koga pismenim aktom odredi ministar, sa pravma rukovodioca organa državne službe osim ako posebnim zakonom nije drugačije određeno.

#### **Član 30.**

##### **(Rukovođenje upravom i upravnom organizacijom)**

- (1) Samostalnom kantonalnom upravom i samostalnom kantonalnom upravnom organizacijom rukovodi direktor, odnosno rukovodilac čiji je naziv određen zakonom ili odlukom o osnivanju uprave i upravne organizacije.
- (2) Rukovodilac samostalne kantonalne uprave i samostalne kantonalne upravne organizacije odgovoran je za svoj rad i stanje u području koje je u djelokrugu uprave ili upravne organizacije tijelu koje ga imenuje na tu dužnost.

- (3) Rukovodilac kantonalne uprave i kantonalne upravne organizacije koja je u sastavu ministarstava za svoj rad odgovara i ministru koji rukovodi ministarstvom u čijem je sastavu kantonalna uprava i kantonalna upravna organizacija.

#### **Član 31.**

##### **(Zamjena rukovodioca samostalne kantonalne uprave i samostalne kantonalne upravne organizacije)**

U slučaju privremene spriječenosti rukovodioca u obavljanju njegovih ovlaštenja i obaveza mijenja ga rukovodeći državni službenik koga pismenim aktom odredi rukovodilac, osim ako posebnim zakonom nije drugačije određeno.

## **DIO ČETVRTI – ORGANIZACIJA, PROGRAM RADA I IZVJEŠTAJ O RADU MINISTARSTVA, KANTONALNIH UPRAVA I KANTONALNIH UPRAVNIH ORGANIZACIJA**

#### **Član 32.**

##### **(Unutrašnja organizacija tijela uprave)**

- (1) Unutrašnja organizacija tijela uprave, utvrđuje se pravilnikom o unutrašnjoj organizaciji.
- (2) Pravilnik o unutrašnjoj organizaciji izrađuje se i donosi na način predviđen propisima o upravi, organizaciji organa uprave u Federaciji Bosne i Hercegovine i propisima koji se odnose na izradu i donošenje tih pravilnika.
- (3) Pravilnik o unutrašnjoj organizaciji ministarstava donosi ministar, a samostalne kantonalne uprave i samostalne kantonalne upravne organizacije rukovodilac samostalne kantonalne uprave i samostalne kantonalne upravne organizacije, uz saglasnost Vlade Kantona.
- (4) Prije donošenja Pravilnika o unutrašnjoj organizaciji rukovodilac tijela uprave dužan je pribaviti mišljenje Sekretarijata za zakonodavstvo, Ministarstva za pravosuđe i upravu i Ministarstva finansija.
- (5) Tijelo uprave koje mijenja nadležnost i organizaciju dužno je donijeti, odnosno uskladiti pravilnik o unutrašnjoj organizaciji, prema odredbama zakona kojim je propisana promjena, u roku od 30 dana od dana stupanja na snagu zakona.

#### **Član 33.**

##### **(Program rada)**

- (1) Tijelo uprave je dužno za svaku kalendarsku godinu donijeti program rada.

(2) Program rada treba biti usaglašen sa programom rada Vlade Kantona.

**Član 34.**  
**(Izveštavanje)**

- (1) Tijelo uprave je dužno o svom radu i stanju u upravnim područjima iz svog djelokruga rada za svaku kalendarsku godinu podnijeti izvještaj o radu.
- (2) Izvještaj se podnosi Vladi Kantona, zaključno s februarom tekuće godine za prethodnu godinu.

**DIO PETI – PRIJELAZNE I ZAVRŠNE ODREDBE**

**Član 35.**  
**(Nastavak rada)**

Danom stupanja na snagu ovog zakona već osnovana ministarstva:

- a) Ministarstvo unutrašnjih poslova – Ministarstvo unutarnjih poslova,
- b) Ministarstvo za pravosuđe i upravu,
- c) Ministarstvo finansija,
- d) Ministarstvo za privredu,
- e) Ministarstvo za prostorno uređenje, saobraćaj i komunikacije i zaštitu okoliša,
- f) Ministarstvo za rad, socijalnu politiku i izbjeglice,
- g) Ministarstvo za boračka pitanja,
- h) Ministarstvo zdravstva,
- i) Ministarstvo za obrazovanje, nauku, kulturu i sport,
- j) Ministarstvo za poljoprivredu, šumarstvo i vodoprivredu,

nastavljaju rad pod nazivom i djelokrugom utvrđenim ovim zakonom.

**Član 36.**  
**(Prestanak s radom i preuzimanje poslova)**

Danom stupanja na snagu ovog Zakona, Veterinarski zavod kao upravna organizacija u sastavu Ministarstva za poljoprivredu, šumarstvo i vodoprivredu prestaje s radom, a njegove poslove preuzima javna ustanova Institut za zdravlje i sigurnost hrane Zenica.

**Član 37.**  
**(Preuzimanje poslova)**

- (1) Tijelo uprave koje ili čija organizaciona jedinica prestaju s radom, mijenja organizaciju ili djelokrug,

nastavlja s radom u sastavu tijela uprave ili drugog pravnog subjekta koji preuzima njegove poslove.

- (2) Službenika i namještenika, opremu, baziranu i drugu dokumentaciju, sredstva za rad, finansijska sredstva, prava i obaveze, organizacione jedinice tijela uprave koje prestaje s radom, preuzima tijelo uprave ili drugi pravni subjekt koji preuzima poslove tijela uprave koje prestaje s radom na osnovu ovoga Zakona srazmjerno preuzetim poslovima, ako drugim zakonom nije drugačije propisano.
- (3) Do donošenja Budžeta za narednu godinu tijelo uprave koje nastavlja s radom finansirat će se na osnovu usvojenog Budžeta.
- (4) Sredstva osigurana Budžetom Kantona za tekuću godinu, za rad tijela uprave koje prestaje s radom preraspodijelit će se na novoosnovano tijelo uprave ili tijelo uprave ili drugi pravni subjekt koji preuzima poslove ukinutog tijela uprave, srazmjerno preuzetim poslovima.
- (5) Ovlašćuje se Vlada Kantona da izvrši preraspodjelu sredstava u skladu sa stavom (4). ovoga člana.

**Član 38.**  
**(Usklađivanje pravilnika o unutrašnjoj organizaciji)**  
Rukovodilac tijela uprave koje mijenja nadležnost, dužno je donijeti, odnosno uskladiti pravilnik o unutrašnjoj organizaciji prema odredbama ovoga Zakona u roku od 30 dana od dana stupanja na snagu ovoga Zakona.

**Član 39.**  
**(Prestanak važenja zakona)**

Danom stupanja na snagu ovog zakona prestaje važiti Zakon o kantonalnim ministarstvima i drugim tijelima kantonalne uprave (“Službene novine Zeničko-dobojskog kantona”, broj: 15/04, 6/07, 2/08, 13/08- prečišćeni tekst, 3/10 i 6/12).

**Član 40.**  
**(Stupanje na snagu zakona)**

Zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: 01-02-21695/15  
Datum, 09.12.2015. godine  
Zenica

**PREDSJEDAVALA**  
**Draženka Subašić, s.r.**

.....





Godina XXVII - Broj 8

ZENICA, srijeda, 30.03.2022.god.

## SKUPŠTINA

156.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona, na 43. sjednici održanoj dana 22.03.2022. godine, donosi:

### ZAKON O DOPUNI ZAKONA O KANTONALNIM MINISTARSTVIMA I DRUGIM TIJELIMA KANTONALNE UPRAVE

#### Član 1. (Dopuna člana 10.)

U Zakonu o kantonalnim ministarstvima i drugim tijelima kantonalne uprave („Službene novine Zeničko-dobojskog kantona“, broj: 10/15) u članu 10. iza stava (2) dodaje se novi stav (3) i (4) koji glase:

- „(3) U sastavu Ministarstva unutrašnjih poslova je Uprava policije.
- (4) Uprava policije vrši upravne i druge stručne policijske poslove utvrđene zakonom i drugim propisima.
- (5) Dosadašnji stav (3) postaje stav (5)“.

#### Član 2. (Stupanje na snagu)

Zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: 01-02-4689/22  
Datum, 22.03.2022. godine  
Zenica

**PREDSJEDAVAJUĆI**  
**Ćazim Huskić, s.r.**

.....